

四庫全書

子部

欽定四庫全書

子部

古夫于亭雜錄卷二

詳校官庶吉士_臣李如筠

員外郎_臣牛稔文覆勘

總校官編修_臣王燕緒

校對官主事_臣陳墉

謄錄監生_臣舒其紹

欽定四庫全書

子部十

古夫于亭雜錄

雜家類三 雜說之屬

提要

臣等謹案古夫于亭雜錄五卷

國朝王士禎撰士禎以康熙甲申罷刑部尚書
里居乙酉續成香祖筆記之後復采綴間見
以成此書自序謂無凡例無次第故曰雜以
所居漁子山有古夫于亭因以為名其中如

據西京雜記鉤弋夫人事以駁正史則誤採
偽書據貴耳集以王安石為秦王廷美後身
則輕信小說據詩元龜象齒之文謂韓非希
見生象之語不足為信據易匪其彭之文謂
竊比老彭彭當音旁訓為側據子華子證詩
有美一人據示兒編解詩黽勉從事則附會
經義以張為為南唐人以俞文豹為元人亦
失於考核然如謂岳珂程史之名出於李德

裕辨劉表碑非蔡邕作辨貼黃古今不同辨
劇談錄元稹見李賀之妄辨丹鉛錄載蘇軾
詞之謬辨洪邁萬首絕句辨西溪叢話誤引
田子春辨才調集誤題王之渙辨唐彥謙誤
詠齊文惠太子宮人皆引據精核品題諸詩
亦皆愜當而記董文驥論擬李白孟浩然詩
記汪琬論新異字句不諱所短若預知其詩
派流弊而防之者可謂至公之論異乎沾沾

自護者矣乾隆四十六年十月恭校上

總纂官臣紀昀 臣陸錫熊 臣孫士毅

總校官 臣陸費墀

古夫于亭雜錄序

歲晚長安殘雪初霽九衢泥深三尺蹇衛駕小車阻淖
不得前排徊道左識蔣五靜山故居問綠楊紅杏之軒
已易他姓訪其子於街南顏坦敗簾昔之香盃酒爨縹
囊緗帙零落不可復覩獨大司寇新城先生夫子亭雜
錄鏤板插架蓬勃塵沙亟取歸補其殘缺使復完好因
憶疇昔辛未之冬偶和先生石帆亭諸詠吾鄉少宰羨
門彭公取粘齋壁先生一見擊賞明年春于慈仁海棠

花下向諸先達稱余名無人知者蓋余方年少自顧學殖淺鄙青袍白苧偶踏軟紅又鮮有氣力者為之汲引以故于名流鉅公未敢通一刺即有相識不過視為尋常無聞之人而先生偶閱壁間詩輒念之不置先生之扶獎後進其用心有大過人者矣先生沈神六籍貫穿百家朝堂政事之暇時作經生咿唔心目所遇釐正踏駁或事恐失傳亟為表微積日累月薈成雜錄五卷而以已之精意別解寓焉夫神經怪牒支離汗漫間有嗜

殆亦非公好至于搜討佚事排比義類徒供摭摭而中
無上下千古之識均毋足存先生于絙窻風雨明燈花
月或燕居孤坐或對客劇談意有所得筆之于書若不
經意者然而舉事詮理必歸至當由其平生浸淫卷帙
冰解的破故拂素含毫根柢深厚非掇拾補綴誇奇鬬
麗不堪尋味者比今先生天上騎箕靜山又玉樓超召
堂前舊燕故壘難尋此板流傳幾為爨釜之燄盛衰今
昔僅一彈指頃不勝感愴云康熙辛丑十二月廿日海

鹽俞兆晟

欽定四庫全書

古夫于亭雜錄卷一

刑部尚書王士禎撰

司馬文正公徽言僅二卷公雜采春秋外傳孔子家語
孟子荀卿韓詩外傳諸書之言為之又其有目而無
其辭者春秋繁露法言太玄文中子新書新序說苑潛
夫論管子莊子墨子意林李翱十餘種陳氏曰司馬溫
公手鈔諸子題其末曰余此書類舉人鈔書然舉人獵

其辭余覈其意舉子志科名余志道德其首書迂叟年六十有八蓋公在相位時且將屬疾而好學不厭克勤小物如此所鈔自國語而下六書其目三百一十有二小楷端謹百世之下使人肅然起敬真蹟藏邵康節家其諸孫迈守漢嘉從邵氏借而刻之攜其版歸越今在其羣從述尊古家是書無門類無義例蓋未成之書也東萊張夙行刻之大梁有尉氏阮漢聞太冲序

安丘女子梁頤字秀中號裒石道人歸韓生頗能詩常

有句云梨花皓月元同色風竹流泉不辨聲蚤卒

高侍郎念東

珩

和寒山子詩云詆佛耽空處空于世何

益此言影響耳元未究實際空者空情想空者空慾嗜
空者空煩惱空者空榮利未發之謂中試想歸何處真
空乃妙有此中生天地空有即中和豈得妄同異鴟鼠
笑鴻鵠下士多苛議學術本上乘反訾無利濟試看王
陽明勲業名當世吹毛詆良知又謂學乖刺旨哉古人
言蚍蜉撼大樹又世儒詆仙佛此亦不足怪弟子不如

師門風坐顛敗兩家之兒孫其行同乞丐都是師了蟲
反把師子壞即如所謂儒科第事冠蓋豈徒周孔羞那
是程朱派所以秦始皇辣手亦痛快前一首破卻頑空
後一首說盡三教末流之弊

盤山釋拙菴訪宋牧仲中丞于吳中一日會滄浪亭唱
和裝字韻拙菴押衲裝近讀唐人李羣玉惱僧自澁詩
常聞天女會玉指散天花莫遣春風裏紅芳點架裝則
裝字從木作去聲唐人用字必有据依惜向來未之知

也案架漿本作髦葛洪始改今字從衣

髦與架音同

釋覺範文字禪跋蘇叔黨書云叔黨行草皆蟬蛻塵垢
筆法亞乃翁惜其蚤世不秋邵陽儉上人攜此帖見過
脩然如見其父子角巾竹杖行小港榕林之下不勝清
絕又跋本上所畜小坡書後云雞蘇本草龍腦薄荷
也東吳林下人夏月多以飲客而俗人便私議坡誤用
雞蘇為紫蘇可發一笑予將發鸞谿上人出示此軸筆
勢飛動學坡而未臻坡險處政如馬巷中遇王謝子弟

步趨狀貌蘊藉風流有自來矣觀此則知小坡不獨工詩賦而書法亦不媿家學矧其忠孝大節尤卓然者哉

黃氏日鈔云覺範本是醫士

寂音石門文字禪有云何忠孺家有石如研以水灌之則枝葉出石門如叢桂狀亦奇物

世但知東坡善畫枯木竹石寂音集中有東坡畫應身彌勒贊云相傳始作以寄少游卿上人得於少游之家則坡老亦工畫道釋人物也

今順德府唐山縣有干言山水經注泚水又東南經干

言山一統志衛風出宿于干飲餞于言即此地理志東

郡有發干縣

今觀城縣

曹氏曰即所謂干路史衛縣南有干

城詩所云出宿于干者或以為今之順德或以為今之東昌或以為今之開封孔氏云衛女所嫁不知何國諸書參錯不同如此未可據依也

豫章徐巨源

世薄

以古文名家余素愛其文中間諸葛武

侯論一篇持論甚謬余既著說以駁之其集末詩話一

金史已見
卷一
條云王劭冬夜對雪詩隔牖風驚竹開門雪滿山云云
使先讀唐詩後看六朝掩姓名而閱之鮮不以為左司
者此右丞詩而巨源以為王劭以為六朝蹻謫甚矣此
亦如李君實不知韓退之山石肇確行徑微一篇同一
笑枋也

康熙三十年寧海州有木工十數人浮海至大洋忽沈
舟其家皆已絕望矣閱八年乃俱歸言舟初入洋倏有
夜叉四輩掣其四角入水至一處宮闕巍煥如王者之居

曰此龍宮也王欲造宮殿而匠役缺故召爾輩至此無
恐也尋傳王命令入亦不見王遂至工所各使飲酒一
甌即不飢渴如是八年不思飲食而工作不輟工既竣
夜叉復傳命爾輩久役于此今可歸矣王有搞直已在
舟中可自取之各令飲蜜漿一碗夜叉引入舟復撮其
四角舟已出水上其行甚駛頃之抵岸忽覺飢渴乃覓
酒肆飲食而舟中已先有錢數百千持以歸舟主楊御
史也操舟者得珊瑚樹一株于洋中將以獻蓋亦龍王

所酬也初諸匠至工所有督工者自言亦寧海人諸生
馮姓春名字大年比歸訪之則馮得狂疾閉置室中八
年矣匠至而疾瘳如舊相識者所言悉同楊名維喬字
岱楨順治己亥進士以御史外遷口北道參議有廉幹
稱

高邑趙忠毅公

南星

高陽孫文正公

承宗

皆北方之偉人天

下望之如泰山北斗二公集皆吳橋范文貞公

景文

刻于

金陵予兒啟訪官畿南屬購二集僅得忠毅公集十四

卷已軼其半有公之子清衡印記蓋其家藏本也公詩

長于古選頗有法度而又能自見其才思惜近體軼不

可見文尤長于碑版如吏部尚書孫清簡公

鑑

山西布

政使王公

述古

兵部職方郎中張公

主敬

諸誌銘翰林侍讀

學士吳公

中行

傳少傅兵部尚書李公

化龍

兵部侍郎魏公

允貞

光祿少卿顧公

憲成

諸碑于國是之是非人才之枉直

痛切言之可裨信史或稱其文滔滔莽莽輸寫塊壘而

起伏頓挫不能稟合古法要其雄健磊落奔軼絕塵止

方之學者未能或之先也予謂讀其文居然有壁立萬仞之槩

予作浯谿考頗搜抉僻秘如李易安二長句皆世所未習見頃讀洪覺範石門文字禪有同景莊游浯谿讀中興碑長句一首恨此書版行已久不及收入亟錄于此以補漏略詩云上皇御天功最盛生民溫飽卧安枕醉凭豔姬一笑適薄夫議之無乃甚長安遮天胡騎塵潼關戰血深没人哥舒臣賊不足惜要鬻國忠如鱸鱗蒼

黃去國食不暇賜歿馬嵬謝天下反身罪已成湯心奈
何猶有譏之者取非其子又遽息靈武君臣無忤容何
須嗚咽讓袞服自鞅歸鞍八尺龍誰磨石壁湘江上揩拭
雲煙濺驚浪龍蛇飛動忠義辭顏元色莊儼相向與君
來游秋滿眼閒行古寺西風晚道人興廢了不知但見
游人來讀碑

此詩與易安二篇皆
未佳但珍其僻秘耳

中州集詩石鼎夜吟詩句健奚囊春醉酒錢麤豪句也
然不如南唐吟凭蕭寺旃檀閣醉倚王家瑋瑁筵風調

媚雅子向謂徐文長詩欠雅馴者以此

唐侯寧極藥名譜人淺曰皺面還丹薺芫曰賊淺

先大父尚書公羣芳譜一條云馬患諸病白鳳仙花連根葉熬膏不論何症抹馬眼四角上即汗出而愈

簾名蝦鬚人多不曉其義升庵丹鉛錄云爾雅以鰓為大蝦出海中者長二三丈游行則豎其鬚高于水面鬚長數尺可為簾洞冥記馬丹常折蝦鬚為杖

常某開平裔孫也居湖孰種菜自給人謂之湖孰菜其

妻即中山女也至是已先逝汪于鼎

洪度

湖孰菜歌云胥

圍寶帶盤羅珍笙歌叢裏莫連晨頭戴簪笠手鉏土烈
燄光中日卓午昔人身未離朱門自道心如游蓬戶今
觀此翁殊不然蚤向朱門曾晏眠天傾地坼身何惜蓬
戶還容受一塵開門江天直入座生涯況有鉏能荷耕
砂耘礫代菑畬細風飄飄吹雨過霜根得氣乳膏蒸迸
泥甲拆聲最清繞膝顧眇色飛動栩栩黃蝶知予情一
肩入市晨光爛道塗所過香風散只數金錢莫問名買

金匱要略卷之八
魚沽酒歸來貫遙望鍾陵土一抔有時落日重迴頭鳳
皇已逐青冥去無夢吹簫共跨遊

于鼎又作鐵券歎甚有史筆其序云明成祖即位封駙
馬都尉王寧永春侯鐵券旌德民得之田間券載寧受
通燕之謗拘繫三年靖難師至始得釋褒其始終不改
之節則其人可知矣 老農得券隴畝旁人間因得瞻
龍光琢鐵嵌金為文章山河帶礪憑永長一代舊制何
輝煌惜哉名以靖難揚金枝玉葉同苞桑豈導姬旦來

輔王不然潛通奚所望華袞字字褒忠良承家只道永
流芳豈知隙影駒奔忙吹簫臺空無鳳皇銅駝陌上隨
淪亡此券流傳天意藏金鐵不減名彌彰

又建文鐘云天留正統還讓帝如以泰谷存陽氣歲晚
冰霜律未回一綫微陽正藏閉我來深山憩古寺瞥見
孤鐘思往事風雷未敢信流言貴戚何當輕易位麤砂
磨治碑版文烈火銷融金鐵製普天盡易洪武年何處還
稱建文歲其時鈎連盡十族斷支交首盈衢市輕生不

乏有心人百年猶為存苗裔赫赫雷霆九天怒威有難
加勢難至正學絲絲一分遺孤鐘歷歷半行字天軸地
維未傾拆萬古千秋此維繫

草除一策萬古公憤右二篇發揮痛快故備錄之于鼎
新安歙人余門人也其息廬詩集余所論定

康熙四十五年丙戌會試總裁官止用二員吏部左侍
郎李錄子工部右侍郎彭會淇房考皆新差直省督學
科道官餘止部屬二人蓋所以杜揣摩之弊也會試總

裁近例用四人正考皆大學士尚書為之變例自此科始

東坡于戰國之士獨取魯仲連顏觸而皆惜其未聞道升菴以為名言今吾邑錦秋湖上有魯連陂顏觸墓

黃山谷云論文則文心彫龍評史則史通二書不可不

觀明王侍郎損仲惟儉作彫龍史通二書訓故以此二訓故

援據甚博實二劉之功臣余訪求二十餘年始得之子

孫所當寶惜

程孟陽

嘉熈

常選元遺山中州集新安有刻本余觀其去

取率不可解即如劉迎無黨之七言古詩李汾長源之
七言律詩乃集中眼目雖北宋作者無以過之顧多從
刊削所収反叢脞不足觀于鼎以此書寄余求增刪重
刻之余謂存而不論可也

唐人常侍言旨記明皇遷西內事云出朱崖太尉所續
程史朱崖者贊皇公也宋岳侍郎珂著程史蓋襲取贊皇
之書以為名字

常疑漢武殺鉤弋事不可解或以為雄猜之主不近人情事亦有之耳考之西京雜記鉤弋夫人從幸甘泉告上曰妾相運應為陛下生一男年七歲妾當死今必死于此不得歸矣願自愛言終而卒香聞十餘里因葬雲陵上哀悼之發冢開視惟衣履存乃為起通靈臺於甘泉據此則鉤弋去來皆非常人常理安得有去去不得活之語邪

康熙四十二年

金匱要略卷之四
恩詔耆民百歲者給與銀兩建坊甘肅巡撫題報三人
寧夏右衛莫進忠一百三歲肅州衛于國良一百歲秦
州李剛一百四歲

邑耆民劉才旺者少曾為先伯祖大司馬公圉人康熙
乙酉年一百八歲尚無恙一夕其子某與數客飲榻前
才旺已卧亦引滿自歌一曲復引滿又歌如前凡三釂
歌亦三闋遂鼾睡明晨視之已化去矣雖本廝役亦達
人也

唐于頔以樂府有想夫憐其名不雅或曰南朝相府有

瑞蓮因歌為相府蓮

或是因王儉蓮幕事耳

至今詩餘有相府蓮

頔所改也余昔與鄒程邨

祇謨

同定倚聲集長調有秋思

耗者余嫌其名不雅改為畫屏秋色今詩餘遂有此名
余所改也

平原董默菴

訥

以御史大夫改江南江西總督有某御

史者造之甫就坐大哭不已董為感動舉坐訝之某出

旋造大冶相余佷廬

國柱

入門揖起即大笑余驚問之對

曰董某去矣拔去眼中釘也京師傳之皆惡其反覆未
幾罷官

平原高苑城晉寧州刺史辟閭允墓前有白銀樹二十
株高苑吾鄉鄰邑也竟不知白銀樹何狀案洞冥記影
娥池北鳴禽苑有青金樹皮間有屑如金西京雜記上
林有白銀黃銀樹各十株

陸魯望詠木蘭花詩云幾度木蘭舟上望不知元是此
花身述異記七里洲有魯班刻木為舟至今在洲中

以武

為李義

山詩

漢元封二年鬱林郡貢珊瑚婦人命植殿前號曰女珊瑚

瑚

京師極貴鹿尾予向引陳子昂賦耶律楚材詩證之考
酉陽雜俎所記乃不始於唐魏使崔劼李騫在中丞劉
孝儀坐孝儀曰鄴中鹿尾酒肴之最劼曰生魚熊掌孟
子所稱雞跖猩脣呂氏所尚鹿尾乃有奇味竟闕載籍
騫曰鄭氏稱益州鹿痿但未是尾耳觀此則自南北朝

金史曰月人言
已貴之

殘鳥魁切弱病也
鹿痿之義未詳

余嘗謂唐末詩人馬戴為冠其行誼亦不可及撫言記
戴佐大同軍幕許棠往謁之流連數月但詩酒而已忽
一旦大會賓友出棠家書授之啟緘乃知潛遣一介郵
其家矣此事亦古人所少

唐相楊叔每下朝常弄一玉婆羅門子高數寸瑩徹精巧
云是子闡王內庫中物周時渠胥國獻玉駱駝高五尺
今人誤以奕碁為彈碁固謬然彈碁之制終亦不解廣

記云今彈碁用碁二十四色色別貴賤又魏戲法先立一碁于局中餘者間黑白圍繞之十八籌成都曹子桓云昔京師先工有馬合鄉侯東方安世張公子常恨不得與之對也國史補唐有吉達高越藏鈎亦謂之意彊亦曰行鈎見庾闡賦其制衆人分曹或有奇則往來于兩頭謂之識鴟亦曰飛鳥

識吾何切吟也說文嘉言也與哦同

唐文宗一日問宰相古詩云輕衫襯跳脫跳脫竟是何物宰臣未對上曰即今之腕釧也真誥有斲粟金跳脫

是臂飾又宣宗嘗賦詩上句有金步搖遣求進士對之
溫庭筠以玉條脫為對宣宗賞焉二事皆見唐人小說

或是一事而傳聞異辭邪

上條出盧氏雜記
下條出北夢瑣言

吳道子畫鍾馗手捉一鬼以右手第二指抉鬼眼時稱
神妙或以進蜀主孟昶甚愛重之一日召示黃筌謂曰
若以拇指掐鬼眼更有力試改之筌請歸數日看之不
足以絹素別畫一鍾馗如昶指并吳本進納昶問之對
曰道子所畫一身氣力色貌俱在第二指不在拇指今

筌所畫一身氣力意思併在拇指是以不敢輒改此雖
論畫實詩文之妙訣讀史記漢書須具此識力始得其
精義所在

昔在郎署有龔萬二郎中同舍相狎龔長身而萬短小
一日同僚畢會龔復以短小為謔萬徐曰左氏云著短
龜長殆為兄發耳一座大笑

文章遲速不同此由天性不關工拙故漢人云飛章馳
檄用枚臯高文典冊用相如唐人詩云潘緯十年嗟古

鏡何涓一夕賦瀟湘又吳道子大李將軍俱畫嘉陵江水於大同殿壁明皇曰李思訓數月之功吳道玄一日之跡皆極其妙蓋又不獨文章為然

唐邊鸞攻丹青尤長于花鳥折枝之妙古所未有晚客澤潞貌五淺連根精妙之至

畫斷

朝野僉載云被馬齧者燒鞭梢灰塗之蜘蛛齧者用雄黃末傅之筋斷者取旋覆花紋取汁以筋相對以汁塗而封之即續

廣五行記云絳州一僧病噎都不下食遺命弟子開其
胃喉視有何物如其言開視胃中得一物似魚有兩頭
徧體肉鱗置盆中跳躍不止以諸毒藥內之藥悉化為
水一僧以藍靛致盆此蟲惶懼繞盆馳走須臾化為水
矣故世傳以靛水治噎疾此與余香祖筆記所記鵝血
治噎相類然鵝血試之亦不甚效

唐天寶中有趙生者其先以文學顯兄弟俱以進士明
經入仕生獨魯鈍年已壯不為郡貢發憤笈數百編隱

晉陽山中旬餘有翁衣褐造之謂生曰子志甚堅老夫雖無術有補于郎君幸一謁我耳且曰吾段氏家于山西大木之下言訖忽無所見生遂往山西尋其跡果有楸樹甚茂生曰豈所謂段氏者乎遂以錘發其下得人參長尺餘肖翁形貌生曰吾聞人參能為怪者可愈疾遂淪而食之自是豁然明悟目所覽書盡能窮其奧歲餘明經及第

宣室志 樂字書
楸舉雅切音賈

畫家畫古人圖像皆須考其時代如冠舄衣褶車服之

類一有踳誤杜纂後人得而指之詩賦亦然宋史繩祖
學齋佔畢稱杜牧阿房宮賦煙斜霧橫焚椒蘭也二句
尤不可及謂六經止以椒蘭為香楚辭言椒漿蘭膏亦
然若沈檀龍麝等字皆出于西京以後近世文士作婕
妤怨明妃曲而引用梅裝蓮步更為可笑此皆齊梁間
事漢時寧有之邪故知作詩賦作畫皆貴考據典故乃
不貽譏後人

宋政和初定命婦八階孺人次以室人後改安人見佔

畢

佔畢載漢西京時南宮寢殿內有醇儒王史威長葬銘
曰明明哲士知存知亡崇隴原塋非寧非康不封不樹
作靈垂光厥銘何依王史威長云見張茂先博物志此
西漢墓銘之最古者

白樂天東林寺藏集唐末為高駢取之宋真宗重令繕
寫裝潢送東林其龍門香山寺本經亂亦不復存後履
道宅為普明僧院後唐明宗子秦王從榮又寫本置院

之經藏即今本是也乃知右文好事不但真宗也

余觀宋景文詩雖所傳篇什不多殆無一字無來歷明
諸大家用功之深如此者絕少宋人詩何可輕議邪
宋初上元中元下元京師皆張鐙上元御乾元門中元
下元御東華門後罷中元下元二節見春明退朝錄
科場舊例凡兼作五經文字者以違例貼出惟順治乙

酉

龍飛首科膠州法若真黃石以五經疏請

上裁

世祖皇帝特恩准作舉人仍授中書舍人丙戌成進士

入翰林此後至康熙戊辰始有查嗣韓

余太學門人

林文英

二人亦經御史疏請

特賜進士查榜眼及第林選庶吉士壬午京闈又有莊
令與俞長策二人亦疏請

特賜舉人遂有

旨以後願作五經文字者聽乙酉各直省習五經者驟

多順天解元張南齡陝西解元王承烈皆五經而吾山東中式者亦三人可謂盛矣又第二場故事有詔誥二道乃具文自明相沿已久至是九卿議凡習五經并令全作詔誥直省進呈試錄增詔誥兩篇自康熙乙酉科始也丙戌會試第十一名索太滿洲人亦五經中式

宋開寶二年詔西川山南荆湖等道舉人皆給來往公券自初起程以至還鄉費皆給于公家不獨右文盛典亦忠厚之至也其享國三百餘年終食士大夫忠義之

報宜矣

南唐李氏鑄鐵錢宋太宗始令收民間鐵錢鑄農器給
江北流民復業者仁宗慶厯初詔江饒池三州鑄鐵錢
助陝西經費民苦之後停罷其患方息山谷詩紫參可
劖宜包貢青鐵無多莫鑄錢蓋謂此也

宋李遵勗本名勗尚長公主真宗御筆加遵字使升為
其祖崇炬之子以父繼昌為兄此最無義理後竟為例
至神宗始降手詔述英宗治命停罷之見燕翼貽謀錄

宋制京師置大宗正司其後又于西京置西外宗正司

南京

今歸德府

置南外宗正司殊非理體

宋賈魏公昌朝建議修唐書初命王文安宋景文楊宣懿趙少卿張尚書余尚書為修纂曾魯公趙龍圖周翰何密直公南范侍郎景仁邵龍圖不疑宋集賢次道為編修而賈為提舉賈罷相用丁文簡丁卒用劉丞相劉罷用王文安王卒又用曾魯公中間景文以修慶厯編敕不到局趙守蘇州王丁母憂張楊皆補外後景文獨

秉筆久之歐陽文忠領刊修遂分作紀志曾亦以編敕
不入局周翰亦未嘗至公南遷開封幕不疑以目疾辭
去以王忠簡秉彛補其缺頃之呂縉叔入局劉仲更修
天文律厯志將卒業而梅聖俞入局修方鎮百官表嘉
祐五年始成書近修明史初以徐閣學立齋元文為監修
翰學葉訥菴方鵠左庶子張素存玉書為總裁分纂者數十
人後或遷官給假去勿論纂修官即總裁亦遷替不恒
最後乃益以熊相國青岳賜履首尾二十餘年成書之難

如此蓋事權不專其在宋時已有然矣司馬子長史記班孟堅漢書皆成于一家父子之手故其書千古不朽而成書亦易惟專故也

宋太宗至道二年司天冬官正楊文鑑建言于厯日六十甲子外更留二十年帝命存兩周甲子共成上壽之數使期頤之人猶見當生紀年遂造新厯頒行知宋時厯日皆載兩周甲子今亦可仿而行之

今六部都察院公署吏戶禮在禁城之東兵部工部在

三部後街之東皆沿明舊惟三法司及兵部督捕侍郎公署與太常寺在禁城之西刑部乃明之鎮撫司署都察院乃明之通政司署前代通政司題名碑尚在而本署題名反為闕如近都察院刻順治已來掌院副院已下題名與前代通政司題名對立于正聽之東西而刑部無之督捕裁歸刑部公署亦廢矣余昔由副都御史遷督捕侍郎由戶部左侍郎遷都察院左都御史由左都遷刑部尚書皆在西故詳著之

宋太宰牧仲華寄近所著筠廊二筆中一條云四明周

杞公

斯盛

曾于人家見一羸貯水中別取水一盂入鹽少

許置羸于內則羸殼自開飛出一蠱高尺許蠱尾一綫綴殼中飛舞良久以羸還納元孟蠱即縮入其理殆不可曉

又云福唐葉文忠公有白玉觀世音一高尺餘脣朱髮漆相好天然不假人力宜興故相家一白玉太真妃睡相乃宋製近為武林一貴人購去

宋時學士院賜御書玉堂者有二前則太宗賜蘇易簡
後則高宗賜周麟之

國老談苑以五帝官天下三王家天下為徐騎省對宋
太宗語與他書所載不同

上嘗

御書清慎勤三大字刻石

賜內外諸臣士禎二十年前亦蒙

賜案此三字本呂本中居仁官箴中語也

余昔在京師有畬宣城梅耦長

庚

送木瓜詩云作貢當

年事已陳煙林搖落重含辛之句陸冰修施愚山

嘉淑
閏章

諸公皆次韻陸用受辛字案宋景文公筆記云益擣辛
物作薺所謂金薺玉鱸東南佳味古說薺曰曰受辛是
曰中受辛物擣之蓋楊德祖解黃絹幼婦外孫薺曰之
語

同年汪鈍翁

琬

晚刻類藁字畫多用古文時人亦有效

之者宋景文云吾友楊備得古文尚書釋文讀之大喜

于是書訊刺字皆用古文僚友多不之識指為怪物要之亦有所不必也

吾鄉武城王文定公

道

嘉靖中官吏部侍郎名臣也其

文錄議論純正節錄數條于此

論鄭衛二國風曰鄭風二十一篇其的為淫佚之辭者
野有蔓草溱洧二篇可疑而難決者丰一篇而已其他
緇衣二叔于田清人羔裘女曰雞鳴出其東門七篇語
意明白難以誣說至于將仲子遵大路有女同車山有

扶蘇籜兮狡童褰裳東門之墀風雨子衿揚之水凡十
一篇序說古注皆有事證可據而朱子一切翻倒盡以
淫奔目之而蔽以放鄭聲之一語殊不知孔子論治則
放聲述經則刪詩正樂刪詩即所以放也刪而放之即
所以正樂也若曰放其聲于樂而存其辭于詩則詩樂
為兩事矣且使諸篇果如朱子所說乃淫佚狎蕩之尤
者聖人欲垂訓萬世何取于此而乃錄之以為經也邪
反正詭道侮亂聖言近世儒者若馬端臨楊鏡川程篁

墩諸人皆已辯之矣又曰鄭衛多淫聲如桑中溱洧男女戲謔之詩蓋亦多矣孔子盡刪而放之其所存者發乎情止乎禮義而可以為法戒者也中間三四篇蓋皆刪放之餘習俗所傳而漢儒于經殘之後見三百之數有不足者乃取而補之而不知其為世教之害也

案左傳韓起聘鄭鄭六卿餞于郊宣子請皆賦子蔣賦野有蔓草宣子曰孺子善哉吾有望矣子太叔賦褰裳子游賦風雨子旗賦有女同車子柳賦籥兮宣子曰二

三君子數世之主也可以無懼矣夫餞大國之使而所賦皆淫奔之詩辱國已甚宣子又何以歎其為數世之主乎此亦一證且知野有蔓草亦必非淫詩也

古人事有極相類者故曹秋岳

溶

侍郎作同書來元成

集

之樵書尤多搜摭近觀南北史偶得數事記之江草除

都官尚書還都贈遺一無所受惟乘臺給一舸舸艚偏欹將濟江或請徙重物以迨輕艚草既無物乃于西陵岸取石十餘片實之此與陸績鬱林石相似魏使尚書

李孝伯聘宋宋孝武帝駿遣長史張暢與語而帝微服
觀之孝伯目帝不輟出謂人曰張侯側有人風骨瞻視
非凡品也此與曹孟德牀頭捉刀相似又中書舍人王
弘為宋太祖所愛謂曰卿欲作士人得就王球乃當判
耳若往詣球可稱旨就席弘如言往球舉扇揮曰若不
得爾弘還白太祖曰我便無如此何此與江數移牀遠
客相似而又在其前

古夫于亭雜錄卷一

欽定四庫全書

古夫子亭雜錄卷二

刑部尚書王士禎撰

江都門人宗元鼎字梅岑以詩鳴江淮間有詠李後主絕句云江淮歌舞尋常事便遣曹彬下蔣州余最愛其措語之妙取入感舊集近覆閱之乃知其誤南唐自元宗時周世宗屢侵淮南國勢削弱至遷都豫章以避之非始宋也後主仁愛無荒淫失德但溺於釋氏耳宋太

祖諭徐鉉曰江南亦有何罪但卧榻之旁豈容他人鼾睡耶亦非以歌舞為兵端宗語非實事矣

有求竹軒名於東坡者久之書扁還之乃竹軒二字甚矣題榜之不易也余再入蜀謁武侯廟見某中丞題榜曰丞相祠堂余深歎其大雅不可移易又吾郡重修歷下亭或題其榜曰海右此亭古亦歎其確此所謂顛撲不破者也

七言律有以疊字益見悲壯者如杜子美無邊落木蕭

蕭下不盡長江滾滾來江天漠漠鳥雙去風雨時時龍
一吟是也有以疊字益見蕭散者如王摩詰漠漠水田
飛白鷺陰陰夏木轉黃鸝徐昌穀開軒歷歷明星夕隱
几蕭蕭古木秋王敬美山鳥自呼泥滑滑行人相對馬蕭
蕭是也詩小雅蕭蕭馬鳴悠悠旆旌楊柳依依雨雪霏
霏此用疊字之始後人千古受用不盡

余每怪新唐書不載詔令往往不詳事之首尾筆記一
條云史近古不對偶今以對偶之文入史如以粉黛飾

壯士笙匏佐鼙鼓乃知其刊削之意然此亦一隅之見
若陸宣公李衛公論事之文何嘗非對偶但須分別觀
之耳

景文云唐蘇廷碩朝覲壇頌有乚虞氏字翰林校讐官
輒點乚字側云疑不知乚即稽字愚按今召仙決休咎
曰乚俗語卻近古

筆記云顏之推說唐末文籍散亡故諸儒不知字學江
南惟徐鉉徐鉉中朝惟郭忠恕錯為說文系傳忠恕作

汗簡佩觿愚案佩觿彙書有之汗簡今吳人汪立名得古本刻之甚古雅惟說文系傳未見不知海內藏書家尚有傳之者否也然謂顏之推語則誤之推後魏黃門侍郎而預知南唐宋初事耶疑是傳寫之謾

余再使蜀於縣州山中見羣鹿賦詩云遠遊忽憶楊岐語只有渠儂得自由用宗門楊岐方會禪師語蓋自言行役萬里不及鹿之飲食止息得自由也余兒啟洊和之用唐呂溫由康賦曰由此康以致他康故曰由康可

謂工切能押險韻宋景文云率鳥者繫生鳥以來之名
國國音由呂得其意而不知說文有此國字國蓋與國
字媒字義同

景文云馬本鳥名為猴名愚案此二字多取以為單名

如漢有劉馬苻秦時有李馬今秀水徐閣學勝力

嘉本

名徐馬唐有丘為張為南唐有江為余門人御史溫為
皆是也然終未雅馴

又云老子云無物之象韓非子曰人希見生象得死象

圖之又案其圖以想其生也余按今生象滇南常貢何希見之有且詩云元龜象齒不應戰國時反不見生象也

又云蕭蕭馬鳴悠悠旆旌顏之推愛之昔我往矣楊柳依依今我來思雨雪霏霏謝玄愛之訐謨定命遠猶辰告安石以為有雅人深致愚按玄與之推所云是矣太傅所謂雅人深致終不能喻其旨

又云左太冲振衣千仞岡濯足萬里流不減嵇叔夜手

揮五絃目送飛鴻愚按左語豪矣然他人可到嵇語妙
在象外六朝人詩如池塘生春草清暉能娛人及謝朓
何遜佳句多類此讀者當以神會庶幾遇之 顧長康
云手揮五弦易目送飛鴻難棘可悟畫理

又云莊周云送君者皆自厓而返君自此遠矣令人蕭
寥有遺世意思謂秦風棘陵之詩亦然姜白石所云言
盡意不盡也

蔡邕集有劉鎮南碑即劉表也案獻帝初平二年夏四

月誅董卓夷三族邕亦庾死初平四年改元興平又三年改元建安而表以建安十三年卒邕之死至是已十六年安得復起九原而為其碑頌耶碑又云太和二年葬於先塋太和乃曹叡年號按丕以建安二十五年篡漢改元黃初在位七年而叡嗣立自建安十三年至是又二十一年距邕之死且四十年矣然則此碑果出邕手否乎

武則天祔葬乾陵過客有譏毀謔浪者輒報以風雷之

異丙子余再使蜀過廣元縣縣古利州武所生處江干
黃澤寺有則天尼像余投以詩云鏡殿春深往事空嘉
陵禍水恨難窮曾聞奪堦瑤光寺持較金輪恐未工蓋
用洛陽伽藍記瑤光寺尼工奪堦之語以謔之也是日
風平浪靜更無風雷之變余笑謂則天虐酷獨能施於
乾陵而不能神於利州耶抑薄余詩為不足較耶

五木呼盧世但知有劉毅耳潘氏紀聞云骰子飾四以
朱者因明皇與貴妃彩戲將北惟重四可轉敗為勝上

連呼之數子宛轉良久而成重四上大悅顧高力士令
賜四緋遂不易云

馬嵬乃人名於此築城以避兵因名見景安征塗記學
圖護蘇載之

杜詩近時馮紹正能畫鷲鳥樣歷代名畫記紹正開元
中官少府監八年為戶部侍郎喜畫鷹鵠雞雉談賓錄
云高力士父喪左金吾衛大將軍陸伯獻少府監馮紹
正二人於喪前被髮而哭甚於已親人皆笑之即是人

也

世以徐敬業駱賓王皆為僧且老壽即不知果然與否亦稍為忠臣義士吐氣若一雪竇禪師而一以為龐勛一以為黃巢必傳會之以叛賊何也此真名教之罪人矣又雪竇寺誌辯黃巢墓云案巢傳唐僖宗乾符中巢寇浙東高駢擊破之後未嘗至浙東也及中和四年始為尚讓所敗巢甥林言斬首以降安得有墓在雪竇山中耶而揮麈錄言雪竇山有黃巢墓邑官歲時遣祭之

然則巢墓亦載祀典耶如此不經之語固亂臣賊子所
樂聞耳

王安石之姦文富諸賢皆為所欺其預識之者惟蘇李
二公耳然貴耳集所載安石初讀書鍾山一長老謂之
先輩必做宰相但不可念舊惡改壞祖宗格法則此僧
識之又在一公之先矣又謂安石為秦王後身不知因
果何以應爾豈銜太宗之怨毒必欲亂其天下雖以真
仁英三宗之賢亦不能挽回耶秦王報怨而為安石錢

王索土而都臨安宋欲不南渡得乎

弇州卮言評中州集云直於宋而太淺質於元而少情
二語最確

余極喜山泉翁山藏柳市無車馬水隔桃源有子孫之
句池北偶談載之矣然不詳為何許人閱壽光縣志乃

知山泉名澄甫姓劉氏字子靜文和公珙之孫正德戊

辰進士官御史有直聲與弟淵甫范泉皆工詩歸田後

與馮閭山裕黃海亭卿諸老為海岱吟社其叔銳號西

橋八歲通五經成化中以神童召見文華殿以廢累官太常少卿與何李康邊諸公相唱和有西橋集

舜殛鯀於羽山化為黃熊入於羽泉是鯀既為熊矣淮南子又云禹通轅轅山化為熊塗山氏慙之至嵩高山下化為石若然則大禹父子皆化熊不根甚矣古傳記荒唐謬悠如此者甚多不可枚舉

大名門人成

文昭

字周卜相國曾孫也寄陸務觀南唐書

宋槧本也凡十五卷與今刻十八卷縮次小異前有陸

金史四庫全書
卷二
友私印陸友仁印燕處超然小印

張易字簡能元城人高祖萬福唐金吾將軍後徙掖縣
易性豪舉尚氣少讀書於長白山又徙王屋嵩山苦學自
勵食無鹽酪齊有高士王達靈居海上博學精識少許
可易從游數年入洛舉進士不中昇元二年歸南唐官
終右諫議大夫改勤政殿學士判御史臺采武德至寶
厯論奏骨鯁者七十二事為七卷曰諫奏集上之見陸書
本傳馬書不立易傳余纂長白山錄偶遺之補錄於此

康熙丙子余奉

朝命祭告華山憩王山史待菴閣架上書有趙松雪集
乃先太師大司馬公較刊本遂告於主人攜歸先太師
所刻書甚多亂後惟文選刪注沈文端公鯉集尚存餘
悉不可問矣得此如拱璧也

老杜玉華宮詩千古絕唱張文潛用元韻擬之作別黃州詩
自謂似之特其音節耳未神似也吾觀谷音下卷所載臨江
楊震宋武帝廟詩雖不摹杜反得神似此非深於詩者未易

知也詩云谿聲畚松風巨石出老拳古樹不知名岌岌蛟龍
纏云云案宋武帝廟在新淦縣四十里尚樂山山經云本禿
女皇后廟禿女少孤後母苦之令牧豕於陂陂生藕因取食
聚藕絲結為履靈鵲銜於武帝殿下帝異之取以為后其說
不經臨江府誌載之亦傳疑也或云唐光化中邑人劉輝以
尚樂山羅公阮地形之勝剏為廟趾而設宋武帝像與禿女
并為一祠遂稱宋武帝廟要無所考據云雲臨江人

放翁筆記言王中父韓持國作詩喜用語助如用舍時

馬耳窮通命也歟居仁由義吾之素處順安時理則然
殆可發笑天啟後竟陵派盛行後生效之多用焉哉乎
也等虛字成句往往令人噴飯不知宋人已有先之者
矣

湘山野錄載真公王欽若微時應舉過圃田為令公邀
飲大第明日跡之乃裴晉公廟也後以翰林學士使西
川回至褒城驛將吏見騶導云是唐相裴令公來謁密
告大用之期以晉公勲德品望何數百年後獨惓惓於

欽若如此且宰相拜罷亦尋常事何預晉公事而僕僕預告之此或其門生親黨傳會造作之語傳聞失實而文瑩遂記之耳如唐小說載李林甫為神仙事亦類此皆誕謾不足信

劉念臺先生

宗周

以御史大夫罷歸舍於逆旅身衣布褐

一童子侍側蕭然如田父野老鄞縣秦進士

祖裏

亦能文

之士初第南歸儀從甚都將入舍於正廳見有一叟方危坐遣僕誰何之知為劉公急避去宋杜祁公致仕居

南京新榜一巍我者出倅巨郡導從呵擁甚盛祁公遇
於通衢無它路可避公乘款段裘帽暗弊二老卒斂馬
側立道旁舉輿障面新貴問從者曰誰乎對曰太師相
公此二事頗相似少年得志者當知此而杜劉二公老
成典型尤可師法也

淄川韓浚官御史時有疏云劉宗
周何物么膺云云人笑之齒冷

同年劉吏部公戡順治己亥官刑部主事將假歸潁川
有詩別予及茗文周量曰緝有句云燕市酒人稀未幾
余作九日詩云十年長事少袁絲公戡見之笑曰何相

報之速耶

古者關將見於書傳者不一余已著之池北偶談又隋書史萬歲傳萬歲戍燉煌竇榮定擊突厥萬歲詣轅門請自効遣人謂突厥曰士卒何罪但當各遣一壯士決勝負耳突厥許諾遣一騎挑戰榮定令萬歲出應之馳斬其首而還此亦關將也

酉陽雜俎載北齊房君豹山池在濟南有詩云風淪歷城水月倚華山樹云云初不詳何許人案隋唐書房彥

謙傳彥謙事伯父樂陵太守豹竭力四時珍果口弗先
嘗乃知豹即彥謙之伯父玄齡大父行也

武人能詩史載沈慶之曹景宗而不知周羅暉按本傳
羅暉在陳為太子右衛率時參宴席陳主曰周率武將
詩每前成文士何反後也都官尚書孔範曰羅暉執筆
制詩還如上馬入陣不在人後

日知錄云唐人稱父為哥舊唐書王琚傳玄宗泣曰四
哥仁孝同氣惟有太平睿宗行四故也棣王琰傳惟三

金史卷一百一十五
哥辨其罪玄宗行三故也

日知錄
崑山顧絳寧人著

溫公家老蒼頭稱公曰君實秀才東坡教之始改曰端
明人謂東坡教壞君實家僕黃氏日鈔云溫公敕獨樂
園洛俗春月放園園子得茶湯錢與主人平分一日園
子呂直納錢十千公命持去後十餘日呂直敕一井亭
問之乃用前不用十千也觀此二事溫公平日修身教
家可知近代權門豪僕如嚴嵩之嚴年張居正之尤七
視司馬僕不居然舜跖徒之分哉而其主人人品相業從

可知矣

黃氏云太宗飛白題翰林學士院曰玉堂之廬此四字
出漢書李尋傳玉堂殿名而待詔者有直廬在其側元
豐中有學士上言乞摘去二字使榜院門以為光寵詔
可是以殿名名其院不典甚矣今相沿既久知此亦少
東坡以紫團漫寄王定國詩豁訝土門口突兀太行頂
豈惟團紫雲實自凌倒景剛風被草木真氣入苔穎舊
聞人銜芝生此羊腸嶺攖攖虎豹鬣蹙縮龍蛇癭蠶頭

試小嚼龜息變方騁矧予明真子已造浮玉境清宵月
挂戶半夜珠落井灰心寧復然汗喘久已靜東坡猶故
日北藥致遺秉欲持三桮根徃徃九轉鼎為予置齒頰
豈不賢酒茗

皮日休謝人葺詩神草延年出道家是誰披露記三桮
開時底定涵雲液斲後還應帶石花名士寄來消酒渴
野人煎處掇泉華從今湯劑如相贈不用金山焙上茶
陸龜蒙和五葉初成椒樹陰紫園峰外即雞林名參鬼

蓋須難見材似人形不可尋品第已聞升碧簡攜持應
合重黃金殷勤潤取相如肺封禪書成動帝心

東坡小圃五詠人沒一首上黨天下脊遼東真井底玄
泉傾海腴白露灑天醴靈田此孕育肩股或具體移根
到羅浮越水灌清泚地殊風雨隔臭味終祖禰青楹綴
紫萼圓實墮紅米窮年生意足黃土手自啟上藥無炮
炙齟齬盡根柢開心定魂魄憂患何足洒糜身輔吾軀
既食首重稽

錢起紫漫歌并序紫漫幽芳也五葩連萼狀飛禽羽舉
俗名之五鳥花故山道人蘭若豐此藥校書劉公詠歌
俾余繼作遠公林下滿蒼苔春藥偏宜閒石開往往幽
人尋水見時時仙蝶隔雲來陰陽彫刻花如鳥對鳳連
雞一何小春風宛轉虎谿旁紫翼紅翹翻霽光貝葉經
前無佳色蓮花會裏暫留香蓬山才子憐幽性白雪陽
春動新詠應知仙卉老煙霞莫賞夭桃滿蹊徑

周繇以人漫遺柯古詩人形上品傳方志我得真英自

紫園慚非叔子空持藥吏請伯言審細看

按周詩殊劣伯言非抗字亦誤也

段成式求人漫詩少賦令才猶彊作衆醫多失不能呼

九莖仙草真難得五葉靈根許惠無

元和中裴晉公為盜所傷隸人王義扞死之公自為

文以祭是歲進士纂義傳者什有三余兒汭官唐山

令夜有盜警小僕紀綱以身衛主死之余亦為文祭焉

帖黃二字前已引王文貞所云著之唐國史補云黃勅

既行下有小異同曰帖黃一作押黃此與今章奏帖黃

不同

國史補云天寶之風尚黨大厯之風尚浮貞元之風尚蕩元和之風尚怪

唐趙璧善彈五弦人問其術曰吾之於五弦也始則心驅之中則神遇之終則天隨之吾方浩然不知五弦之為璧璧之為五弦也此語與莊子相似

南唐徐知諤好蓄奇翫從粵商得一鳳頭彩翠奪目朱冠紺毛金嘴如生廣五寸其腦平正可為枕以錢五十

萬償之

劇談錄元和中進士李賀善歌詩元相國稹年老以明
經擢第常願結交執贄造門賀覽刺遽令闔者謂曰明
經擢第何事來看李賀相國慚憤而退按元擢第既非
遲暮於賀亦稱前輩詎容執贄造門反遭輕薄小說之
不根如此

經霜冬瓜皮同朴硝煎湯治翻花痔立愈或以蘿蔔代
瓜皮亦可 烏藥細磨冷濃茶治湯火瘡 生白礬末

半分入臍以一指甲水滴之治婦人小便不通 細辛

白芷雄黃以好酒研末入麝香少許服治蛇犬傷 鹽

和油敷治鼃鼃跛遍身生絲 亂髮灰吹入鼻治鼻衄

黃連一兩酒浸曬吳茱萸一兩滾湯泡七八次聞桂

花香止曬乾用神麴為餵作丸如桐子大食後以荷葉

湯送下三十丸治梅核膈 蜜陀僧滑石等分薑汁調

敷治腎囊瘡 金絲荷葉擣汁塗患處治蛇傷 甘草

濃煎汁調地龍糞塗擦治小兒腎囊虛腫 人中白火

煨存性一錢銅綠三分麝香為末二分擦治小兒走馬
牙疳端午日收桑葉陰乾為末空心滾白湯下治痔

舊樓燒灰置瓦上收火氣清晨溫茶調服三四錢治婦

人血山崩

已上俱見
鄉媛記

橄欖解河豚毒槐花微燭與乾

燕支等分同搗碎水調灌亦能解毒

見報
耕錄

新城東北有龐家湖亦名龐居士湖相傳以為龐居士

沈金處然不知居士何許人也陶南邨輟耕錄云相傳

龐居士家貲鉅萬殊用勞神自念曰若以予人又恐人

之我若不如置之無何有之鄉遂輦送大海中舉家削
道總成證果即此事也湖在錦秋湖之西青沙湖之東
邑誌當補入

陳去非語人云本朝詩慎不可讀者梅聖俞也不可不
讀者陳無已也見邵掃編如此議論殊不可解

陶南邨述歷代醫師列殷仲堪於西晉又分貞白先生
陶宏景為兩人疎謬甚矣

元人俞文豹稱其兄文龍駿諸葛忠武之言曰孔明之

才謂之知時務則可謂之明大義則未也謂之忠於劉
備則可謂之忠於漢室則未也又龍泉葉氏習學記言
論昭烈武侯謂其以一隅而抗天下與公孫述相去幾
何又謂臣死之日不使內有餘帛外有贏財以負陛下
然以上當更有事又謂鞠躬盡瘁死而後已至於成敗
利鈍非臣之明所能逆覩此全不是議論又謂其於義
利之際更宜詳處若其義不深其效不遠故材薄而功
陋且與荀彧並稱凡詆譏忠武者無所不至若二子者

可謂名教之罪人亦薛能之比與

葉氏論史記伯夷列傳云負芻吳光皆弑君竊國子臧季札尚不恥立於其朝況武王周公以至仁大義滅商夷齊奚為而惡之云云以此尚論古人是長亂臣賊子之風短忠臣義士之氣其罪可勝誅哉

葉氏論晉人物首推溫嶠智以緯忠再匡晉室取與伸縮一本至誠充其所能非東晉人才也一人而已此論得之

葉氏亟稱梁武帝情念在民精擇守宰拔舉人才不隔
前後博雅通經精義不窮所謂游畋聲色翫好致敗之
具色色無之不特江左所無秦漢以來語賢君者皆未
易及此論亦自有見

葉氏謂詩有美一人清揚婉兮邂逅相遇適我願兮序
詩者謂男女思不期而會余固疑其非是案孔子引此
以況程子然則凡詩人稱美人皆謂賢者其於刺淫貶
色要須特有所指乃可從爾不然則彼何足以污簡策

而復載重出諄悉不已哉此論得之

書奕云小說載人漫果亦有據大食王遣人之海上見一方石石上有樹枝赤葉青蔥生小兒手足著枝上不

語能笑

書奕黃
東石著

張橫浦家蓄犀帶一胯中有一月過望則見蓋犀牛望月之久故感其影於犀

古今推好士者率以韓蘇並稱余嘗考之退之非子瞻比也李翱與韓侍郎書云如兄者頗亦好賢然必甚有

文辭兼能附已順我之欲則汲汲孜孜引拔之矣若不
能然則將乞丐不暇安肯汲汲孜孜為之先後云云由
此觀之退之但喜附已者耳安能盡天下之才如子瞻
之好士者哉

元丞相已延使于闐國於井中得一玉佛白如截肪高
可四五尺

劉宋王惠為吏部尚書兄鑒好聚斂惠謂曰何用田為
鑒怒曰無田何由得食惠又曰何用食為余常慕其人

故從宦四十餘年祇守先人田廬惟增一別墅以其在山水之間耳

隋獨孤后性妬忌後宮莫敢進御此猶婦人之常也以太子勇多內寵則讒而廢之高潁賢相也其妾生子后聞而惡之屢譖於帝竟殺潁乃至諸羣臣有妾孕者必勸帝斥之一婦人之妬而其禍家國至此異哉

雙槐歲鈔記宣德癸丑諭改進士為翰林六科庶吉士分兩等合三科進士共選二十八人前此解學士繒亦

為中書科庶吉士云

成化中南京給事中王淵王徽合疏劾內閣被謫時以
言路風力北不如南為之語曰南京科道猛如虎九年
考滿陞知府北京科道縣如羊九年考滿陞京堂蓋因
淵徽二人發非謂例也

洪武初進會試錄止刻序文與執事官及中式姓名三
場題目至乙丑戊辰始刻文見黃瑜雙槐歲鈔

華亭門人周庶常策銘龔寄元人揭曼碩泥金細書金

剛經工妙不減二王末題字云翰林國史院編修臣揭
傒斯奉勅焚香盥手拜書至治二年二月吉旦

明大理莆田林炳章有留耕園別業歿後建祠其中子
弟輩延師許國器讀書祠側萬厯己酉許科試不錄無
意秋闈暑月晝寢夢林告之云君今歲當薦賢書胡不
赴省試覺而異之果以遺才入試中式己未登第又彭
副使憲范諸生時讀書園中禱於神一日坐祠下忽一
葉飄墮其前有蟲蝕成文曰今科而舉是年萬厯戊子

果中式其弟某亦來禱復有葉墜下其文曰子亦能科
某喜頗自負後竟老於諸生其子汝亨舉崇禎庚子科
鄉試其靈驗如此此與九鯉湖皆在莆而知之者少

康熙二十九年九月閩興化府西巖寺發地得一穴甃
以巨甃甃上有花卉紋三面凸起旁篆太康八年八月

日作辟亭使

闕

中獲古鏡一古劍一金環數枚環徑二

寸劍脊有字土花剝蝕不可辨

徐巨源

世傳

云江陵去揚州三千二百里已行一千三所

有二千在此有何情何景而古雅雋永味之不盡凡作六朝樂府當識此意故錄其語

古同官同姓者率以所居之地別之如西楊東楊南楊

東王西王

直英

皆君子也劉文和

珙

劉文穆

吉

同居內閣

稱東劉北劉而邪正判然

知人實難宋富司馬諸公不能預燭王安石之姦明英宗以李文達公之歿諭王忠肅公使舉可任內閣者忠肅薦五人而萬安與焉殆不可曉若焦芳能薦劉文肅

忠
亦不可解豈以鄉里故耶

弇州盛事述載父子官三品以上者工部尚書畢亨子
副都御史昭吾邑人也司空為弘正間名臣今墓在系
河北岸中丞祔馬碑版尚存而宰樹翦伐盡矣每過之
輒為歎息

何左丞真初以義兵勦東莞賊王成陳仲玉等仲玉就
禽懸賞購成成奴阿巢伺間縛成以出真如格賞之而
使具湯鑊烹阿巢此事與竇建德誅王軌奴事相類光

武媿此多矣

萊州府城東北滿家亭子有水石之觀地產石色理如
碧玉瑩如水晶可為印章但苦質脆耳先兄考功客萊
時余寄詩云雁門石硤谷岷山玉子岡古人風流入筆
墨每恨道遠難攜將滿家亭子水清妙試采瑤華來錦
囊兄有答詩載集中南陽門人李鴻常貽余墨晶印章
色如點漆而溫潤如玉尤可愛余刻其文曰茗柯有寶
理鴻名相文達公裔孫也

史載陳伯獻稱林文安公

瀚

賤者即之不知其為貴卑

者即之不知其為尊愚不肖即之不知其為賢智獨非
意相干者即之始知其凜然不可犯余常服膺斯言竊私
淑之而媿未能也

王文定論朱子不取東萊讀詩紀一條最為確論今錄
於此云東萊讀詩紀多是裁剪先儒成說擇其理之正
者用之間有少出已見又皆謙退和平深得詩人本意
且恪守序說推其甚難解處方以別義代之亦不犯程

子說書必非古義轉使人薄之戒學者不可以朱子之言而遂輕視之也又曰朱子說詩大意盡具於此然甚是偏拗恐不得聖人刪述本意馬臨端文獻通考逐一辯之甚明切且使朱子見之當心服矣

福王欲謚刑部尚書王世貞為文憲而孟津為相力沮之不識何意時同議補謚者高啟文愍周新忠直況鍾肅惠陶魯襄靖王思文端王三善襄烈朱燮元襄寧亦格不行

四川劍州有小廟祀鄧艾余欲告州守廢之而未果追

賦一絕云申屠曾毀曹瞞廟常侍

高適達夫

還焚董卓祠劍

閣至今思伯約蜀巫翻蹇棘陽兒後閱唐彥謙詩云昭烈遺勅死尚羞揮刀斫石恨譙周如何千載留遺廟血食巴山伴武侯三代之直古今人所見畧同也


元白長慶集皆有老劉白謂夢得元謂太真非一人也

唐彥謙齊文惠宮人詩認得前家令宮人淚滿裾那知梁佐命全是沈尚書余以事實考之誤也文惠太子武帝長子

鬱林王之父蚤薨鬱林即位西昌侯鸞輔政鬱林失道
鸞遂謀篡弑盡害高武諸王是為明帝鸞之子東昏侯
無道無罪殺尚書令蕭懿懿弟衍乃起兵於襄陽益明帝
乃高武二帝之仇而梁之革命在東昏之世與文惠相去遠
矣不應捨蕭鸞而怨及梁也詩人之不核史事如此

馬人見韓詩衙時龍戶集上日馬人來注馬人出後漢
書馬援傳又馬人繁昌山名在銅官鄉山多奇石形肖
人馬宋人詩霧浴千峰失馬人

梁亦有朱買臣元帝將也王僧辯既平侯景表請還都
建鄴宗慄黃羅漢阻之而止及魏師逼江陵買臣拔劍
欲斬二人以謝天下元帝曰此出朕意非二人之罪乃
已



古夫于亭雜錄卷二

欽定四庫全書

子部

古夫于亭雜錄卷三
五

詳校官庶吉士_臣李如筠

員外郎_臣牛稔文覆勘

總校官編修_臣王燕緒

校對官主事_臣陳墉

膠錄監生_臣舒其紹

欽定四庫全書

古夫于亭雜錄卷三

刑部尚書王士禎撰

崑山顧絳亭林作革除辯其言確當不可易此史館所當知者畧曰成祖以建文四年六月己巳即皇帝位夫前代之君若此者多即其年改元矣不急於改元者本朝之家法也不容仍稱建文四年者歷代易君之常例也故七月壬午朔詔文一疑今年仍以洪武三十五年

為紀其改明年為永樂元年并未嘗有革除之說即云
革除亦革除七月以後之建文未嘗并六月以前及元
二三年之建文而革除之也故建文有四年而不終洪
武有三十五年而無三十二三十三三十四年云云或
曰洪武有三十五年而無三十二三十三三十四年可
乎考之於古後漢高祖之即位也仍稱天福十二年其
前則出帝之開運二年故天福有十二年而無九十一
一年與成祖之仍稱洪武豈不闇合者哉

近少年才人負奇夭折有雲間夏完淳存古故吏部瑗
公允彞之子十七歲著大哀賦不減庾子山世多傳之
豫章黎祖功者爾前淞江提學博庵元寬之子詩甚奇
崛意不可一世亦十七歲江行死於盜先是賦吁嗟行
一篇不數日遂死若讖然其詩云山何不攢峰為及以
絕我脰天何不降玉為棺以封我尸區區姓氏人不知
面目塵土何所為魯連好個儻曹公無威儀肯如小儒
舉舉衣裳學仲尼起齧我筆燔我詩手中提攜三尺兒

誰博白兔兩丸泥荒雞驚起夜亂啼神鬼駢駢得志天

地悲南城陳伯璣

允衡

取其遺集入詩慰新建陳士業宏

緒序之序亦奇

邊華泉尚書集有送于利四絕句利吾縣人弘治己酉

舉人官揚州府同知苑馬寺卿璧之子也邊詩云送君

城南橋笑折城南柳歸來掩關坐皎月當窗牖露下夜

已久清軒調玉琴淒涼湘水曲窈窕白頭吟一別春城

雨兩回秋月圓樽前不盡醉書札但空傳離腸似連環

宛轉不可絕相送淮水秋相思燕地雪

觚不觚錄云故事投刺通書簡面皆書一正字及萬厯丙子入朝投刺俱不書正字初亦以為雅既而知其為江陵諱也是正字一諱於秦始再諱於江陵矣

弇州先生明盛事述父子至三品九卿工部尚書畢公亨子都察院右副都御史昭蚤達十九歲今王方伯

象坤中解元二十歲登第已上俱吾縣人方伯即二先伯祖也又異典述天順七年庚午會試貢院災舉人

死於火者九十人俱特贈賜進士出身內榮華新城人
弘治中太監李廣敗吏部員外郎張綵疏言太監汪直
梁芳撓亂國典惑聖心脫死幸矣久擯不用而陛下
復召還之李廣招權納賄致陛下受姦諛蠱惑之名而
不自知軍民罹貪殘剝削之害而無所愬今縱不追儆
其罪豈可併置其惡黨漫不懲戒乎伏望斷自聖心凡營
求餽遺者大臣致仕小臣罷黜云云其言頗正乃正德
初劉瑾亂政綵與焦芳首相比附躡致通顯卒致大辟

身名俱敗貽笑千古前言竟自蹈之何哉

正德中給事中屈銓祭酒王雲鳳先後疏請判定正德元年以後現行事例編集成書頒布中外又請瑾釋奠如魚朝恩故事銓不足言雲鳳號稱名臣乃亦醜顏為此何也雲鳳與喬莊簡王瓊齊名號河東三鳳莊簡尚矣瓊與雲鳳何異華歆之龍尾乎虎谷集詩文皆未成家然一時名流如石邦彥喬白巖儲柴墟邵二泉王陽明韓苑洛五泉皆與唱和

金匱要略卷之三
中官張雄幼為繼母所凌遂怨其父銳既貴不與相見
同類或勸之雄乃立中堂垂簾杖其父二十既乃相抱
而泣此亦千古奇聞

錢寧家有祖母綠如來像白玉琴白玉琵琶各一

王寧波方田

崇義

筆談一條嘉靖甲辰榜諸公取其名之

相近者作一聯云蕭一鶚余一鵬羅一鸞何一舉以登
科李九功方九叙金九成戈九章而作樂蓋以四人名
轅合之其巧如此又乙未榜有勞姓者號原野為屯田

郎中時都水郎顧號一江同年也戲勞曰原野屯其田
空勞碌碌勞應聲曰一江都是水四顧茫茫聞者絕倒
順治戊子山東鄉試解元伊闕吾縣人三名連應鄭樂
安人四名綦汝舟高密人五名戚延錫黃縣人皆希姓
時謂之五花榜辛卯九十九名韓魏膠州人一百名柳
燾臨清人時謂韓柳押榜及丁酉末二人王颺昌高密
人謝某時又謂王謝押榜

杜牧詩小溪光汎汎宋黃仁傑詩八月不虛為朽月今

年賴得是豐年楊用修云八怕平聲又丈加切案正字通普八切攀入聲爾雅西極于八國八西極水名又水相激聲韓愈詩潦江息澎八與泮同張衡南都賦流湍投濺汾八輶軋注音八八有平去入三聲

予少時有一聯云山雲遙變夏水草靜當軒汪茗文程周量皆喜之六合李侍郎聖一獨云律詩一聯中銖兩須字字相稱軒字恐對夏字不過余深服之又余少時最愛李太白牛渚西江夜孟浩然掛席幾千里諸篇數

數擬之董侍御玉蚪規余云律詩須句句做未可但騁
逸氣余亦深服之此皆余五十年論文益友今俱宿草
追思愴然聊記之以示來者

陸放翁詩扁舟繫著古梅林初以為汎然語耳按宋縉
雲馮時行從諸朋舊十有五人攜酒具出西梅林分韻
賦詩林本王建梅苑樹老其大可庇一畝屈盤如龍孫
枝叢生直上尤怪古者凡三四酒行以舊時愛酒陶彭
澤今作梅花樹下僧為韻然後知梅林之義蓋梅林即

所謂梅龍者也

虞伯生送袁伯長扈駕上都詩中聯云山連閣道晨留輦野散周廬夜屬橐以示趙承旨子昂曰美則美矣若改山為天野為星則尤美虞深服之蓋鍊字鍊句之法與篇法竝重學者不可不知於此可悟三昧

丹鉛錄載東坡贈青神楊棟詞云允文事業從容了要岷峨人物後先相照見說君王曾有問似此人才多少而引小說高宗問馬騏蜀中人才如虞允文者有幾云

云按允文采石之功在南渡以後時東坡之歿久矣安得先有此詞誤甚矣而曹能始蜀中十志亦載之畧不駁正何也

左思別傳云皇甫謐西州高士摯仲治宿儒知名非思倫比劉淵林衛伯輿竝蚤終未嘗為思序注皆思自為以重其文案太沖三都賦自是接跡揚馬乃云假諸人為重何其陋耶且西晉詩氣體高妙自劉越石而外豈復有太沖之比別傳不知何人所作定出怨謗之口不

足信也太沖吾鄉臨淄人

右丞詩萬壑樹參天千山響杜鵑山中一夜雨樹杪百
重泉興來神來天然入妙不可湊泊而詩林振秀改為
山中一丈雨潼川志作春聲響杜鵑方輿勝覽作鄉音
響杜鵑此何異點金成鐵故古人詩一字不可妄加如謝
茂秦改宣城澍江淨如練作秋江亦其類也近餘姚譚
宗纂唐律秋陽諸名家詩無不妥加點竄古人何不幸
橫遭點剝如此

蜀中十志以物類相感志十八卷為東坡著謬甚不知何據按此書是宋初僧贊寧著

普曜經言太子薩婆悉達手七弓一發透七鐵鼓又一手執大象擲著城外還以手接之不令傷損又發一矢穿大鐵圍山誕妄不經極矣且如來為人天師詎與孟賁烏獲角力耶何其鄙而無識耶

勾濤字景山成都人官史館修纂重修哲宗徽宗實錄高宗一日謂相檜曰勾濤久閒性喜泉石可進職除一

山水近郡檜對永嘉有天台雁宕之勝上曰永嘉地遠
可以湖州命之高宗此事可謂憐才矣

王偁東都事略淹貫有良史才與曾子固臨平集顏頤
上下然蜀志載偁父禮部侍郎賞著玉臺集東都事略
一百二十卷則此書亦如遷固之史記漢書本於談彪
耶但未得此書全本不知是百二十卷否偁於父書之
外有所增益否偁亦不當沒其父之名掩為已有也俟
更考之賞看山人

新津任淵字子淵常注宋子京黃魯直陳無已三集號稱博洽又摘山谷詩文為精華錄按淵紹興元年乙丑類試第一仕至潼川憲其稱天社任淵者新津山名也

漢樂府鼓吹二十二曲今所存朱鷺以下是也魏繆襲吳韋昭晉傅玄皆擬之率淺俗無復古意其詞尤多狂諄如昭之關背德襲之平南荆元之宣受命惟庸蜀等篇信信狂吠讀之髮指而左克明郭茂倩皆取以附漢曲之後何其謬也無已寧取柳宗元謝翱耳

文字之於先達遇合似有夙緣有不可解者如高陽李

文勤公之於曹祭酒頌嘉禾真定梁公之於汪刑部李

角

懋麟

臨朐馮文毅公之於陳舍人賡明玉栢鄉魏公之

於董秀才文友

以寧

服膺讚歎不啻若自其口出然諸君

皆及門若文友與栢鄉則平生未嘗識面而傾倒如此

更可異也余門人吳江葉進士元禮

舒崇

神清不減衛叔

寶少負雋才嘗注庾子山哀江南賦為時所稱康熙已

未博學宏詞之舉閣中諸老亟薦之皆欲為之道地益

公論也元禮至京師而病病旬日竟死豈非其命乎是時文友已前歿而栢鄉罷相久矣汪陳亦連蹇不遇惟頌嘉以中書舍人改編修累官國子祭酒

宋初潘閔跣跣不羈然其詩實有可觀如久客見華髮孤權桐廬歸初月無朗照落日有餘暉漁浦風水急龍山煙火微時聞沙上雁一一皆南飛右詩在唐人中亦推高作

往在京師於卞中丞家觀袁安卧雪圖人物生動林木

離落間積雪皓然鬚眉衣裘皆有寒色因憶宋真宗常
以此圖賜王欽若令至金陵擇江山最佳處張之因置
諸賞心亭太平佳話千載而下談之齒頰俱芳不知即
此本否但以之賜欽若不免夜光暗投耳數年來此畫
往來胸臆欲賦一詩終不能成聊記於此

先大父尚書府君明天啟中以儀制郎扈惠王之國著
剪桐載筆一卷載銅梁張襄憲公肖甫家藏清明上河
圖第二本後病中戒子孫曰此圖有名於世初本為豪

貴胄取賈禍他日有求者便可與之公歿後幾年中正
某宦於蜀以三百金檄銅梁令往求之公之子某如甘
所戒而返其直中丞得之喜甚再使銅梁令將命終雖
其直不受令乃大張供具伎樂召公諸子姓宴飲盡歡
而罷按張擇端上河圖曾入嚴分宜家所謂豪貴者細
世蕃也肖甫之見過於李衛公遠矣

侍御傅彤臣

展

余同邑同年也博雅能詩為詞曲亦右

致順治辛丑請急歸康熙戊午應博學宏詞之徵明年

報罷往來滄洲道中感秋柳賦詩二十首多可誦身
著述散佚聊錄數章於此以見一斑云灞橋橋畔美人
居性慧能為倒薤書一覩覩容頻問訊十眉新樣近何
如絕代容華照眼明幾年聲價重金城誰言青鬢垂五
老一到臨風百媚生零露蕭晨半未乾日高猶自怯
寒連錢驄馬驕嘶過青眼樓頭帶笑看殘照芙蓉溢額
紅珊珊骨節玉瓏璁幾番眠起嬌無力披拂偏宜少女
風垂金小篆不曾謊葉葉紛披撒與波截柳編蒲無田

處祇傳新樣似元和靈和前殿見丰姿成辟耽情寫艷
詞九月受風秋色裏冶游心醉麴塵絲拂隄又復映征
帆折贈還宜女手摻薄暮一番微雨後江州司馬濕青
衫

東漢末有議郎張華與蔡扈同以博奧著在茂先之前
今人止知茂先著博物志耳右見從伯文玉
與玟籠鵝館
集惜不記出處

從兄孤絳
純士詠新月詩云乍見一簾水回頭月抱肩黃

如浮醉酒痿比壓琴弦孤絳少有叔寶神清之目書法擅絕一時弱冠殉崇禎壬午之難

洪覺範作夾山本禪師銘云白塢林間矯如飛鶴不涉春緣碧巖花落宛然坡谷語

昔在京師士人有數謁余而不獲一見者以告崑山徐尚書健菴乾學徐笑謂之曰此易耳但值每月三五於慈

仁寺市書攤候之必相見矣如其言果然廟市賃僧廊地粥故書小肆皆曰攤也又書賈欲昂其值必曰此書

經新城王先生鑒賞者粥銅玉窯器則曰此經商丘宋先生鑒賞者謂今冢宰牧仲華也士大夫言之輒為絕倒

林子羽鳴盛集四卷其同郡邵銅所編銅作後序稱中憲大夫温州府知府成化三年丁亥歲也按邵銅天順間以御史言事忤權姦與張鵬等十三人皆左遷知縣載葉文莊水東日記

葉文莊公盛云古人所作墓文碑誌叙述子婦者甚少

詳書其子之行實生卒及婦家之世出者加少也惟歐陽圭齋於圭塘之父獨然豈變例歟圭塘者元中書省參知政事魯郡公許公有壬也余平生為人纂碑版文字多矣率遵古法而世俗不知多以為怪至有詰其不書之故者蓋皆不讀書考古之過也

華陰王伯佐

宜輔

來求其父山史

弘撰

墓銘以文五峰畫驪

山圖潤筆上方自題云萬歷乙亥孟夏四月以董巨墨法寫驪山弔古圖蓋唐世游觀勝地貞觀建之天寶成

之弔之者後之鑒也豈直區區楮墨之間哉五峰山人文伯仁書時年七十有四余昔登驪山山之佳處在東繡嶺石甕寺一帶林麓礪壑映帶如畫而西繡嶺平曠但可造宮殿宜輦路耳故華清朝元諸遺趾尚在其處詳余秦蜀驛程後記

童子入家塾講誦之餘令其屬對凡以調聲律覘器識不為無補昔程篁墩舉神童以此得名余邑前輩沈澂川淵先生幼時塾師夏楚之負痛投地師曰一滾滾下

地能對則貫汝公應聲曰兩登登上天師大奇之後果
以嘉靖乙丑登進士入翰林官國子司業余八九歲時
先父尚書府君召叔祖洞庭象飲叔祖豪於酒而工草
聖有張顛之風大父顧余兄弟曰醉愛羲之蹟余應聲
對曰狂吟白也詩公大喜賞以名人書畫扇謂先君曰
此子必蚤成後順治辛卯倖叨魁薦府君時年九十一
猶及見之乙未成進士歷官左都御史刑部尚書府君
暨先君皆累贈如其官

明時京師士大夫冬日製貂為套著冠帽上以禦寒名曰帽套一詞林乘馬謁客有騎而過者掠而去之明日入署訴于其僚同年某公好謔改崔顥黃鶴樓詩贈之云昔人已偷帽套去此地空餘帽套頭帽套一去不復返此頭千載空悠悠衆皆大笑

謝在杭

肇

與友人登張秋之戌巳山酒間徵古來干支

命名者如子午谷丁戌山丙穴之類而不及丁卯橋癸辛巷漢宮之甲觀吳興之癸亭何也

唐劉伯芻品水以中泠為第一惠山虎丘次之陸羽則以康王谷為第一而次以谷簾惠山古今耳食者遂以為不易之論其實二子所見不過江南數百里內之水遠如峽中蝦蟆碚纔一見耳陋亦甚矣不知大江以北如吾郡發地皆泉其著名者七十有二以之烹茶皆不在惠泉之下宋李文叔格非郡人也常作濟南水記與洛陽名園記並傳惜水記不存無以正二子之陋耳謝在杭品平生所見之水首濟南趵突泉次以益都孝婦

泉在顏神鎮青州范公泉而尚未見章丘之百脉泉右皆吾

郡之水二子何嘗夢見余常題王秋史華二十四泉草堂云翻憐陸鴻漸跬步限江東正此意也

明世宗末年患喉閉江西一糧長運米至京以山豆根煎進立愈後徐文貞階病亦以此方奏効

余居易錄載奇疾數事又謝在杭云浙有士人一手指忽痛指甲間生珊瑚高二寸許氣成海市有人物城郭樓臺醫皆不識何症或以為火也投以大黃而愈此與

穆桂陽吏部晚年額上皮肉腫起晶瑩中有一人騎驢
往來終日不少休同一怪症即緩扁未必知也

宋慶歷時有宦官蓄一古鏡背鑄鬼形而其影在鑑中
明人小說載驛丞問楊文懿公官名洗馬日洗幾馬公
奮之云云水東日記又載一事劉洗馬定之與兵侍王
偉遇於朝偉戲劉曰吾太僕馬多公須一一洗之劉應
聲曰何止太僕諸太僕諸司馬不潔我固當洗之耳聞
者快之偉即媚王振者

日本國重儒書十三經而下無所不有獨無孟子中國人有私攜過海者輒有風濤蛟龍覆舟之患此理之不可解者余謂孟子泰山巖巖氣象於此猶見一斑歷數千年貯蠶如在也刺孟非孟之屬其亦可以不作矣

柴窯於陶器中最古流傳至今者碎片與金翠同價亡

友劉吏部公弼

體仁

每自詡其詩文為柴窯片雖謔語亦

有所本也

說文驢父馬母曰羸馬父驢母曰駃騠玉篇驢父牛母

金史四庫全書
卷三
曰駝駟

元至正間有范益者京師名醫也一日有嫗攜二女求
診曰此非人脈必異類也當實告我嫗泣拜曰我西山
老狐也與之藥而去今小說平妖傳實借用其事而所
謂嚴三點則南昌名醫也余已別記於居易錄又傳中
杜七聖與蛋子和尚鬪法斬葫蘆事見五雜俎乃明
嘉隆間事皆非杜纂也

宋洪容齋纂唐人萬首絕句曾表進孝宗御覽批畲甚

優又賜茶一百夸清馥香十貼薰香二十貼金器一百
兩當時右文之盛可以想見然余觀其書蹟謄清亂如
何遜沈警乃梁陳間人槩行采入何警句江暗雨欲來
浪白風初起改作絕句至唐小說如東陽夜怪錄諸詩
皆載之敬去文虛倚馬之類亦載之更為不根而四唐
之詩畧無詮次有一人之作而分屬數卷者尤難檢閱
蓋當日祇欲取盈萬首都無持擇故也余每病之歸田
後選鈔數百首別為一集以繼文粹詩選之後面目差

改觀矣

吾鄉風雅明季最盛如益都王

坦遵

太平長山劉

孔和

節之

尤非尋常所及王巡撫

濬

子劉相國

鴻訓

子也余為作合

傳他如益都王

若

湘客諸城丁

耀元

野鶴丘

石常

海石掖縣

趙

士詰

伯濬

士亮

丹澤萊陽姜

埰

如農弟

埰

如須宋

政

文玉

弟

琬

玉叔董

樵

樵谷淄川高

珩

蕙佩益都孫

廷銓

道相趙

進美

韞退章丘張

光啟

元明新城徐

夜

東癡輩皆自成家余久

欲輯其詩為一集傳之未果也孫

本朝拜相高吏部侍郎趙興琬俱按察使丁丘皆以教
職遷知縣丁自有集余僅記丘馬上見一絕云薄羅衫
子凌春風誰家馬上口脂紅馬蹏躑入落花去一谿柳
條黃淡中

太學春秋祭例遣大學士一人主之翰林官二員公獻
公宴惟祭酒與大學士南北相向司業則側坐余為祭
酒時值高陽李文勤公代祭公與余有師生之誼余欲
移席公曰古禮不可廢也卒從之時太常卿薛君梁公

斗柱輦皆側坐

朝廷重師儒如此

王晉谿一生仇彭裏毅然跡其行事邪正判然侯吏部
一間錄謂王祀鄉賢久萬歷四十六年督學某始草之
為非此鄉曲之私言非公論也

一間錄云呵膠出塞外可以羽箭婦人貼花鈿呵噓隨
融此與克州阿膠非一物也世多不知

故友山陽丘洗馬季貞

象隨

與張虞山

養重

游淞東行處州

山中各有即事詩一云西風黃葉無人徑破廟山神對
古松一云百年無與人間事老死深山古木中今人穰
穰入市者不知世有此境

永壽明月山婁敬祠神像是其肉身後潰里人貯之石
匣更為裝塑石匣尚存祠中水旱厲疫禱之輒應

古夫于亭雜錄卷三